

DOPUNSKA ODLUKA

Tekst ove Dopunske odluke na engleskom jeziku se u svim slučajevima smatra autentičnim tekstom.

ARBITRAŽNA ODLUKA ZA SPOR OKO MEĐUENTITETSKE GRANICE NA PODRUČJU BRČKOG

Arbitraža za oblast Brčko

Republika Srpska

protiv

Federacije Bosne i Hercegovine

DOPUNSKA ODLUKA

Predstavnici:

Za Republiku Srpsku:

gđin Nikola Kostić
Styler Kostich LeBell,
Dobroski & McGuire

John M. Adams

Za Federaciju Bosne i Hercegovine:

gđin Frank McCloskey
gđin Edward Delaney
Barnes & Thornburg

gđin Jay Zeiler
Akin, Gump, Strauss, Hauer & Feld

KAZALO

I. UVOD

II. NAVODI STRANA

III. RAZVOJ DOGAĐAJA POSLIJE ODLUKE OD VELJAČE 1997.

IV. POTREBA ZA NASTAVKOM MEĐUNARODNOG NADZORA

V. ROK ZA DONOŠENJE KONAČNE ODLUKE O MEĐUENTITETSKOJ GRANICI

VI. DOPUNSKA ODLUKA

VII. AUTENTIČNOST

I. UVOD

1. Odlukom ovog Tribunala od 14. veljače 1997. godine (u daljem tekstu "Odluka") je uspostavljen režim za međunarodni nadzor u spornoj oblasti Brčko, pri čemu je Tribunal zaključio da u tom trenutku ne bi bilo cjelishodno odlučivati o tome "kakva bi konačna raspodjela političkih nadležnosti...nakon isteka prelaznog nadzora" najuspješnije postigla implementiranje Daytonskog sporazuma i uspostavila lokalnu demokratsku vladu predstavničkog karaktera u oblasti Brčko. Odluka, stavak 104 (II) (A). Uz to je Tribunal ovlastio obje strane da u

razdoblju od 1. prosinca 1997. do 15. siječnja 1998. godine ulože zahtjev za donošenje daljih mjera koje bi uticale na Odluku u pogledu raspodjele političkih nadležnosti u ovoj oblasti. Id. Federacija je uložila blagovremeni zahtjev; Tribunal se zatim konzultirao sa zastupnicima obje strane i usvojio dogovorene rokove za podnošenje podnesaka i vođenje rasprave; u Beču je od 5. do 12. veljače 1998. vođena rasprava punih osam dana; konačni pismeni podnesci strana su bili gotovi 4. ožujka 1998. godine.

II. NAVODI STRANA

2. Kao što je rečeno u Odluci, Opšti okvirni sporazum o miru u Bosni i Hercegovini (u daljem tekstu Daytonski sporazum) predstavlja glavni izvor pravnih principa i principa pravičnosti kojima ovaj Tribunal mora da se rukovodi. Prema ovom Sporazumu, Tribunal je dužan političke nadležnosti u oblasti Brčko raspodjeliti na taj način da se u najvećoj mogućoj mjeri sprovedu imperativne norme iz Dayton-a u pogledu slobode kretanja širom cijele zemlje, povratka prognanika i izbjeglica, ponovnog uspostavljanja multietničkog društva i demokratizacije političkog procesa, a sve to u interesu regionalnog i međunarodnog mira. Vidi Odluku, stavak 95-99. Sukladno ovoj obvezi, Tribunal mora "sagledati činjenice u svjetlu toga da li se ovi principi sada poštivaju u spornoj oblasti i kako se to može obezbijediti u budućnosti." Odluka, stavak 83.

3. U cilju smanjenja međuentitetske napetosti u oblasti Brčko i postizanja maksimalnog poštivanja Daytonskog sporazuma u toku 1997. godine, Odlukom je predviđeno postavljanje međunarodnog supervizora ovlaštenog da po potrebi donosi naredbe i propise po kojima bi se obje strane poticale da u punoj mjeri poštivaju Daytonski sporazum i kojima bi se promicali i štitili legitimni interesi obje strana u oblasti Brčko. Pored toga, Odlukom su obje strane obavještene da će Tribunal u naknadnom postupku strogo voditi računa o tome u kojoj se mjeri strane dalje pridržavaju Daytonskog sporazuma. Sukladno tome, obje strane su se tokom rasprave u Beču usredotočiti na sljedeća ključna faktička pitanja: prvo, do koje mjere su strane uspjele da obezbijede poštivanje Daytonskog sporazuma u toku prethodnih dvanaest mjeseci; i drugo, do koje mjere se od svakog entiteta može očekivati da bude pouzdan "zaštitnik" interesa obje strana u budućnosti.

4. Ne pokušavajući da se ovdje sažeto izlože svi dokazi iznijeti na raspravi, glavne točke svjedočenja su bile sljedeće:

(a) Federacija je nastupila sa obimnim dokazima u prilog tome da su tokom 1997. godine zvaničnici Republike Srpske ("RS"), flagrantno kršeći Daytonski sporazum i Odluku, uporno pružali otpor svim pokušajima supervizora i Federacije da se u oblasti Brčko postigne sloboda kretanja, povratak prognanih osoba i izbjeglica i uspostavljanje demokratske multietničke vlade. Osvrćući se na opstrukcionizam, predsjednik Federacije Ejup Ganić je iznosio argumente u prilog zahtjeva Federacije za dodjeljivanje Brčkog Federaciji, tvrdeći da je takav korak neophodan za postizanje "pravde" u pogledu dva aspekta: svim bivšim stanovnicima Brčkog mora biti omogućen povratak i ponovno useljenje u njihove domove, te građanima Federacije treba pružiti otvoreni pristup Hrvatskoj i ostalim dijelovima Evrope preko Brčkog. Napominjući da su srpske snage tokom rata izvršile etničko čišćenje u oblasti Brčko, i tvrdeći da je RS sada "u stanju rasula", što se vidi iz pojedinih nedavnih političkih događaja (stavke 9-11 niže), Federacija je tvrdila da se RS ne može povjeriti uloga adekvatnog zaštitnika interesa Federacije u toj oblasti.

(b) Tokom rasprave, RS je stalno isticala svoj interes u pogledu teritorijalnog kontinuiteta (tj. očuvanja koridora u oblasti Brčko kao veze između istočne i zapadne polovine RS), tvrdeći da je očuvanje takvog koridora pod isključivom kontrolom RS strateški apsolutno neophodno da bi se (na primjer) po potrebi omogućilo kretanje oružanih snaga RS širom čitavog entiteta. Prema mišljenju RS, svaka pomisao o stavljanju koridora u oblasti Brčko pod kontrolu Federacije predstavlja anatemu, naročito uslijed navodnog "nejedinstva" u vlasti Federacije.

III. RAZVOJ DOGAĐAJA POSLIJE ODLUKE OD VELJAČE 1997.

5. U cilju pronalaženja "pravičnog rezultata" (Vidi Odluku, stavak 88), Tribunal je prije svega dužan da analizira događaje iz 1997. godine, te najnoviji politički razvoj i njihov mogući uticaj na oblast Brčko i izglede za dugoročno poštivanje Daytonskog sporazuma. U donošenju svoje niže navedene Odluke, Tribunal se oslanja na sljedeće činjenice sadržane u dokaznom materijalu koje su strane podnijele tokom arbitražnog postupka.

6. Robert W. Farrand, veleposlanik SAD, je u ožujku 1997. godine postavljen na dužnost supervizora za oblast Brčko. Od travnja kada je zapravo stupio na scenu, veleposlanik Farand i njegovi suradnici su energično i vješto

pristupili džinovskom zadatku da se ni od čega stvore novi programi za postizanje stvarne slobode kretanja u toj oblasti, povratak bivših stanovnika Brčkog (naročito Bošnjaka i Hrvata), stvaranje kompletног novog sistema multietničke op}inske vlasti i oživljavanje lokalne privrede.

7. Uprkos ogromnim naporima tima supervizora, na raspravi je bilo jasno utvrđeno da su se vlasti RS u Brčkom prema uputstvu Srpske Demokratske Stranke ("SDS") sa Pala tokom cijele godine aktivno suprotstavljale svim programima supervizora usmjerenim ka postizanju poštivanja Daytonskog sporazuma u oblasti Brčko. Da navedemo nekoliko primjera: po naređenju Ministra za unutrašnje poslove koji djeluje pod kontrolom Pala, policija RS je u Brčkom na više načina sistematski ometala slobodu kretanja sjeverno od međuentitetske granice, uključujući korištenje nezakonitih kontrolnih punktova i neosnovano hapšenje; sistematski su zastrašivani svi Bošnjaci i Hrvati koji su ispitivali mogućnost povratka u svoje bivše domove u oblasti Brčko; malobrojne bošnjačke i hrvatske porodice koje su i dalje živjele u toj oblasti su bile izložene pritisku da je napuste; kada je 1. maja 1997. godine, grupa Bošnjaka došla u Brčko na razgovor sa supervizorom, pri napuštanju grada su bili kamenovani, a da niko za to nije bio pozvan na odgovornost; 28. kolovoza 1997. izbili su ozbiljni neredi i napad koji su izgleda bili organizovani od strane Pala i upereni ne samo protiv Bošnjaka koji su došli u posjetu, nego i protiv IPTF-a, SFOR-a i ostalog međunarodnog osoblja, što je prouzrokovalo brojne povrede i veliku materijalnu štetu, a da opet niko nije bio krivično gonjen; uoči općinskih izbora u septembru, SDS je prouzrokovala tako ozbiljne nepravilnosti u pogledu registriranja glasača da je postupak morao biti obustavljen i otpočet iznova pod povećanim međunarodnim nadzorom. Očigledan cilj svih ovih kršenja Daytonskog sporazuma koji su bili dirigovani sa Pala je bilo očuvanje "etnički čistog" srpskog sastava regionala, kako bi se potpuno spriječilo ostvarivanje obveza iz Dayton-a u pogledu povratka Bosne i Hercegovine na multietnički sastav koji je imala prije rata.

8. To ne znači da je Federacija do sada besprijeckorno poštivala sadržaj i duh Daytonskog sporazuma. Na primjer, postoje brojni dokazi da su vlasti Federacije aktivno sprečavale povratak bivših srpskih stanovnika u Sarajevo i druga mjesta na teritoriji Federacije. Odsustvo potpune implementacije Daytonskog sporazuma na području Sarajeva je posebno bitno uslijed toga što se nekoliko tisuća Srba, bivših stanovnika Sarajeva, nastanilo u Brčkom u domove Bošnjaka i Hrvata koji bi sada željeli da se vrate kući, ali ne mogu jer su u njihovim domovima Srbi koji se ne mogu vratiti u Sarajevo. Stoga, iako se vlasti Federacije žale da RS ne dozvoljava bošnjačkim i hrvatskim prognanicima povratak u Brčko, tom problemu u velikoj mjeri doprinose i same vlasti Federacije. Vidi Sarajevsku deklaraciju od 3. veljače 1998. godine. Pa ipak, uslijed sistematskog otpora RS prema provedbi Daytonskog sporazuma u oblasti Brčko tokom većeg dijela 1997. godine, čini se da su principi pravičnosti jasno prevagnuli u korist zahtjeva Federacije za isključivom ili zajedničkom kontrolom nad oblasti Brčko.

9. Iako je ovakva situacija prevlađivala tokom većeg dijela 1997. godine, politička slika u RS je počela da se mijenja u srpnju te godine. Izbio je ozbiljan i javni sukob između SDS vodstva sa Pala (uključujući gospodu Karadžića, Krajišnika i Buhu) i predsjednice Biljane Plavšić koja se izdvojila od grupe sa Pala i uspostavila svoje sjedište u Banja Luci. Iako su stare nacionalističke anti-daytoniske teme SDS-a nastavile dominirati političkom retorikom u istočnom dijelu RS i u Brčkom, gđa Plavšić je zauzela progresivniji stav, odvojila se od SDS-a, formirala novu partiju (SNS) i na izgled sa entuzijazmom počela da prihvata Daytonski sporazum. Razdor između ove dvije grupe se od srpnja neprestano produbljivao.

10. Događaj koji može (ali ne mora) da predstavlja ključnu prekretnicu se odigrao 18. siječnja 1998. godine. Određene grupe u Narodnoj skupštini RS, uključujući pristalice gđe Plavšić, su se izdvojile od svojih ranijih saveznika i otvoreno prkoseći SDS-u izabrale Milorada Dodika za predsjednika Vlade. U govoru koji je održao te večeri gđin Dodik je otvoreno odbacio načela SDS-a, pozivajući RS da poštuje "Evropsku konvenciju o ljudskim pravima kao integralni dio Daytonskog sporazuma", založio se za princip regionalne demokratske vlasti širom RS, kritikovao prethodnu vladu uslijed "ometanja Daytonskog sporazuma na svaki mogući način" i tražio potpunu "demokratizaciju" društvenih struktura u RS.

11. Mogućnost toga da pojava gdina Dodika predstavlja fundamentalnu promjenu u smjeru politike RS (za razliku od kratkotrajnog pokušaja da se utiče na arbitražni postupak) je dodatno potkrijepljena njegovim svjedočenjem pred ovim Tribunalom. Izjavljujući da nikad nije bio član SDS-a i da se oduvijek suprotstavljao nacionalizmu, gđin Dodik je detaljno opisao čitav niz reformi koje je uspio da sprovede u roku od dvadeset dana nakon izbora, od kojih su sve bile usmjerene ka odbijanju načela SDS-a i uspostavljanju buduće suradnje sa Federacijom. Iako je rekao da po njegovom čvrstom ubjedjenju Brčko treba da ostane u okviru RS, dodao je da će, ukoliko se nacionalistička politika ostavi po strani i Bosna i Hercegovina postane stvarno demokratska, "međuentitetska granica postati nebitna," što očito znači da će međuentitetska granica imati isto onoliko političkog efekta koliko, recimo, i granica između dvije interne političke oblasti bilo koje zapadnoevropske zemlje. On se konkretno složio da se Bošnjacima i

Hrvatima mora dozvoliti povratak u Brčko i omogućiti kontrola nad lokalnom upravom u Brčkom ukoliko dobiju to pravo na izborima.

12. Prema mišljenju Tribunala, najimpresivniji stav gdina Dodika je bilo i ostaje njegovo prihvatanje idealja o Bosni i Hercegovini kao integriranoj etničkoj demokratskoj državi u kojoj će granice između dva entiteta postati irelevantne. Ovaj stav navodi na mogućnost da ukoliko gđin Dodik politički preživi izbore u RS zakazane za rujan 1998. godine i ukoliko se na kraju godine on i njegove kolege u novoj Vladi RS i dalje budu kretale prema njegovom deklariranom cilju, onda će zahtjevi pravičnosti biti mnogo ravnomjernije raspoređeni između dviju strana nego što je to danas slučaj. S druge strane, predstojeći mjeseci mogu donijeti potpuno drugačiji rezultat: gđin Dodik može da izgubi uticaj ili da promjeni svoj stav, što bi ozbiljno ugrozilo zahtjev RS za isključivom kontrolom nad oblasti Brčko.

IV. POTREBA ZA NASTAVKOM MEĐUNARODNOG NADZORA

13. S obzirom na to da su neki svjedoci na raspravi u Beču tražili da se odmah ukine režim za međunarodni nadzor uspostavljen Odlukom, Tribunal će najprije razmotriti pitanje da li da se nastavi prelazni režim za međunarodni nadzor u oblasti Brčko.

14. Kratak odgovor na to pitanje je da će, bez obzira na to kakvu odluku Tribunal sada donese o položaju međuentitetske granice, još dugo postojati evidentna potreba za nastavkom međunarodnog nadzora. Tačnije, bilo koja promjena u statusu Brčkog (bilo da se dodijeli Federaciji, bilo da se stvari "neutralna zona") će stvoriti potrebu za nadzorom u toku perioda prilagođavanja, a uzimajući u obzir nepromijenjeno ponašanje RS od Dayton-a, kao i dalje postojanje napetosti u toj oblasti, ista takva vrsta režima bi bila potrebna za održavanje *statusa quo*. Zapravo, vodstvo oba entiteta shvata postojanje dalje potrebe i priznaje da, neovisno od sadašnje odluke Tribunala, određeni nivo međunarodnog nadzora treba i dalje nastaviti kako bi se smanjila postojeća napetost u ovoj oblasti. Uzimajući u obzir izjavu supervizora Farranda na raspravi o tome da nove multietničke ustanove koje on njeguje u Brčkom još uvijek nisu "pustile korijenje", naročito uslijed neprekidnog uticaja SDS-a u Brčkom, potpuno je jasno da postoji potreba za nastavkom tekućeg nadzora i ubuduće. Ova Dopunska odluka donosi rješenje u tom smislu.

V. ROK ZA DONOŠENJE KONAČNE ODLUKE O MEĐUENTITETSKOJ GRANICI

15. Postoje ubjedljivi argumenti u korist neodložnog donošenja konačne odluke o položaju međuentitetske granice u oblasti Brčko, tj. da li će sporna oblast biti dodjeljena Federaciji, da li treba da ostane u okviru teritorija RS ili treba da bude proglašena za "specijalnu" ili "neutralnu" zonu kao što je nagovješteno u Odluci. Vidi Odluku, stavak 103. Tribunal je uezao u obzir sljedeće: (a) Odlukom je predviđeno donošenje konačne odluke sada; (b) obje strane tvrde da žele konačnu odluku sada; i (c) Tribunal bi pozdravio mogućnost da zatvori predmet i prestane sa radom.

16. S druge strane, prije nego što se prikloni ovim mogućnostima, Tribunal mora da razmotri da li je sazrio trenutak za donošenje odluke koja bi predstavljala "dugoročno mirno rješenje". Odluka, stavak 97. Iako je učinjen određeni napredak, u ovom trenutku i dalje postoji nekoliko onih istih čimbenika koji su prije godinu dana naveli Tribunal da odloži odlučivanje o konačnoj raspodjeli političke kontrole u oblasti Brčko. Što je najvažnije, napetost i nestabilnost su ostale na visokom nivou u regionu, uglavnom uslijed otpora koje je vodstvo SDS-a pružalo naporima supervizora da podstiče poštivanje Daytonskog sporazuma. Tribunal mora isto tako uzeti u obzir činjenicu da zajedničke ustanove Bosne i Hercegovine još nisu potpuno profunkcionirale i da su brojne entitetske ustanove i dalje suočene sa organizacionim problemima.

17. Štaviše, Tribunalu se čini jasnim da će mu razumno odlaganje odluke o međuentitetskoj granici vjerovatno obezbijediti čvršću osnovu za pronalaženje najpravičnijeg ishoda. U trenutku pisanja ove Odluke, a na osnovu nedavnih događaja, sasvim je moguće očekivati da će do kraja tekuće godine doći do značajne promjene u stavu Vlade RS u pogledu provedbe Dayton-a i suradnje sa Federacijom, u kom slučaju bi eventualna odluka donijeta danas, gledano unazad, bila manje pravična nego što je mogla biti. Tačnije, okolnosti koje su postojale krajem 1997. godine su sugerirale da Brčko treba direktno prebaciti u Federaciju, što bi tom entitetu dalo isključivu kontrolu nad oblasti Brčko po završetku režima nadzora. Pa ipak, značajne promjene na političkoj sceni RS do

kraja 1998. godine bi vjerovatno moglo učiniti jednu od alternativnih opcija pravednjom i povoljnijom za dugoročnu regionalnu stabilnost. Svjesni smo da će odlaganje stvoriti još jedan period neizvjesnosti, pa ipak smatramo da će potencijalna dugoročna korist od odlaganja biti, što se pravednosti tiče, vrijedna neizvjesnosti koja će trajati još nekoliko mjeseci.

18. Važno je razmotriti da li bi ovakvo odlaganje, koje će očigledno koristiti RS, nanijelo štetu interesima Federacije. Naš zaključak je da bi ovi interesi u prelaznom periodu trebalo biti dobro zaštićeni brojnim mehanizmima međunarodne zajednice. Kao što je već navedeno (Vidi stavak 4 gore), svjedočenje predsjednika Federacije Ganića se uglavnom odnosilo na interes koji svi građani Federacije imaju u tome da se bivši stanovnici Brčkog vrate u svoje domove u tom gradu i da se preko Brčkog ostvari ekonomsko povezivanje sa europskim tržištima. Oba interesa su, naravno, prema Daytonском sporazumu potpuno opravdana i Tribunal je ubijeđen da će u toku perioda odlaganja ovi interesi biti u dovoljnoj mjeri zaštićeni i unaprijeđeni zajedničkim snagama supervizora, novih multietničkih vladinih ustanova u Brčkom (što uključuje multietničku policiju), IPTF-a i SFOR-a. Štaviše, predloženo odlaganje može ići u prilog Federaciji: ukoliko se odlaganjem dobije dodatno vrijeme za jačanje progresivnih snaga u RS i otpočinjanje njihove suradnje sa Federacijom i programima supervizora za provedbu Daytona, od toga će imati koristi cijela Bosna i Hercegovina; a s druge strane, ukoliko se dogodi suprotno, pravo koje Federacija polaže na isključivu kontrolu oblasti Brčko će biti utoliko jače. Zapravo, korist koja će proisteći od odlaganja bi trebalo da traje ne samo u periodu do donošenja konačne odluke, već i tokom čitavog međunarodnog nadzora, kao i nakon toga.

19. S obzirom na sve okolnosti, skloni smo mišljenju da se konačna odluka o međuentitetskoj granici mora odložiti do početka 1999. godine kada će Tribunal moći da uzme u obzir sve značajne događaje koji se eventualno odigraju u tom ključnom periodu promjene. Stoga, Dopunska odluka predviđa konačnu fazu arbitraže krajem 1998. godine.

20. Polazeći od dužnosti Tribunala da djeluje sukladno "relevantnim pravnim principima i principima pravičnosti," moglo bi se tvrditi da su gore navedena rješenja neprikladno zasnovana na čisto "političkim" razlozima i da ne počivaju u dovoljnoj mjeri na pravu ili pravednosti. Mi se sa ovim ne slažemo uslijed već navedenih razloga. Jedna od jedinstvenih osobina ove arbitraže je da ona po svojoj suštini obuhvata političke aspekte samim tim što zahtijeva da Tribunal raspodjeli političke nadležnosti između dva entiteta na način koji bi išao u prilog ciljevima Daytonskog sporazuma. Štaviše, iako je Tribunal dužan da doneše konačnu odluku odmah "kada to bude moguće uraditi u sukladno relevantnim pravnim principima i principima pravičnosti" (Odluka, stavak 102), on ne treba da donosi dalje mjere sve dok se situacija ne stabilizira toliko da omogući donošenje rješenja koje ima izgleda da bude dugoročno. Vidi Odluku, stavak 101. Stoga smatramo da aspekti prava i pravičnosti nalažu uvođenje relativno kratkog odlaganja kako bi se prikupili dopunski podaci o najvjerojatnijem toku provedbe Daytonskog sporazuma i toku odnosa između dva entiteta u budućnosti.

21. Konačno, Tribunal se osjeća dužnim da pošalje jasnou ali važnu poruku političkom vodstvu RS: uzimajući u obzir sistematsko nepoštivanje (odnosno kršenje) Daytonskog sporazuma u oblasti Brčko tokom većeg dijela ako ne i cijele 1997. godine, konačna odluka Tribunala o međuentitetskoj granici koja će se donijeti krajem 1998. ili početkom 1999. će definitivno oslabiti pozicije RS u oblasti Brčko, osim ukoliko RS do tada aktivnim djelovanjem jasno ne dokaže da je zaista promijenila svoju orientaciju i opredijelila se za trajni program pune provedbe Daytonskog sporazuma i oživljavanja oblasti Brčko. Da bi to aktivno dokazala, RS će morati da demonstrira značajne nove rezultate vezane za povratak bivših stanovnika Brčkog, neometanu slobodu kretanja, čvrstu podršku multietničkim vladinim ustanovama, uključujući multietničku policiju, kao i punu saradnju sa supervizorom i vlastima nadležnim za provedbu pravednih i demokratskih izbora u rujnu 1998. godine. Stoga u narednoj fazi postupka, Tribunal očekuje da od RS dobije dokaze koji svjedoče o veoma energičnom i dosljednom programu korigiranja stava i poštivanja Daytonskog sporazuma u toku cijele 1998.

22. Iako su obveze Federacije u pogledu poštivanja Daytonskog sporazuma u oblasti Brčko manjeg obima (s obzirom na trenutačni položaj međuentitetske granice) nego obveze RS, Tribunal mora da upozori Federaciju da će, prilikom odlučivanja o konačnom položaju međuentitetske granice, njen pravo na oblast Brčko biti umanjeno ukoliko ona u punoj mjeri ne bude izvršavala svoje obveze u pogledu omogućavanja bivšim stanovnicima Federacije da se vrate u svoje domove, prije svega u Sarajevo. Vidi stavak 9 gore.

VI. DOPUNSKA ODLUKA

23. Sukladno gore navedenim razlozima, Tribunal usvaja sljedeća rješenja i odredbe koje čine sastavni dio Odluke,

imaju obvezujući karakter za sve strane potpisnice Aneksa 2 Općeg okvirnog sporazuma o miru i kojih se sve strane moraju pridržavati i sa njima u potpunosti surađivati.

24. Režim nadzora uspostavljen Odlukom (u stavku 104 (I) (B)) se nastavlja uz sva ovlaštenja i nadležnosti koje su Odlukom predviđene. U svojstvu zamjenika Visokog predstavnika za Brčko, supervizor u oblasti Brčko ima ovlaštenja jednaka onima koja su, prema Bonskoj konferenciji od prosinca 1997., data Visokom predstavniku, uključujući i pravo da smijeni bilo koje zvanično lice koje, po mišljenju Supervizora, neadekvatno surađuje u njegovim naporima da obezbijedi poštivanje Daytonskog sporazuma, učvrsti demokratske ustanove u oblasti i revitalizuje lokalnu privredu.

25. Supervizor je ovlašten i bilo bi poželjno da poduzme odgovarajuće mjere u cilju ekonomskog oživljavanja, uključujući sljedeće: (a) reintegriranje gospodarstva onog dijela predratne općine Brčko koji se nalazi sjeverno od međuentitetske granice sa gospodarstvom okolnih dijelova, (b) stvaranja slobodne carinske ili posebne gospodarske zone u oblasti Brčko radi stimuliranja privrede regiona, (c) stvaranje programa privatizacije državnih i društvenih preduzeća u oblasti sa istim ciljem i (d) ponovno otvaranje savske luke u Brčkom, aktiviranje Saobraćajnog preduzeća Bosne i Hercegovine i podsticanje međunarodne podrške razvoja luke.

26. Do donošenja daljih mjera Tribunal po zahtjevu bilo koje od strana, međuentitetska granica na teritoriji predratne općine Brčko će ostati nepromijenjena. Tribunal će razmotriti i donijeti odluku po zahtjevima koji budu podnijeti između 15. studenog 1998. i 15. siječnja 1999. Odluka Tribunala po podnijetom zahtjevu će biti donijeta u što je moguće kraćem roku.

27. Tribunal ovim daje na znanje (1) da će svaka dalja odluka Tribunala vjerojatno biti u značajnom stepenu uslovljena time u kojoj su mjeri strane postupale *bona fide* sukladno Daytonском sporazumu i odredbama Tribunalala, i (2) da će po adekvatnom zahtjevu Tribunal ozbiljno razmotriti mogućnost (a) takvog povlačenja ili pomjeranja međuentitetske granice da Brčko sa okolinom pripadne teritoriji jedne ili druge strane i (b) pretvaranja predratne općine Brčko u "neutralnu zonu" van isključive kontrole bilo kog entiteta.

VII. AUTENTIČNOST

28. Tekst ove Dopunske odluke na engleskom jeziku se u svim slučajevima smatra autentičnim tekstom.

Roberts B. Owen

predsjedavajući arbitar

Ćazim Sadiković

Vitomir Popović

arbitar

arbitar

15. ožujka 1998.

Fusnote

1. Profesor Ćazim Sadiković i dr Vitomir Popović, dvojica arbitara Tribunalala koje su postavile strane, se do današnjeg datuma nisu pridružili ovoj Dopunskoj odluci. Poslije rasprave u Beču, sva tri člana Tribunalala su se sastala, diskutirala i razmijenila mišljenja. Gospoda Sadiković i Popović su zatim podrobnije izložili svoja gledišta u detaljnim pismima upućenim predsjedavajućem arbitru. Na osnovu ovih dokumenata je jasno da u ovom trenutku nije moguće donijeti većinsku odluku 2:1, uslijed čega će "odluka predsjedavajućeg arbitra biti konačna i obvezujuća po obje strane." Vidi Odluku, stavak 5.

2. Sa obzirom na dalje izloženu Odluku, navešćemo samo ukratko određene ključne činjenice, a ne detaljno činjenično stanje.

3. Čak i tokom ponovnog registriranja, SDS je prouzrokovala tako ozbiljne nepravilnosti da su izborne vlasti kaznile SDS (čija su prva tri kandidata bila uklonjena sa liste te stranke) i predsjednika lokalnog Izbornog povjerenstva u

Brčkom (koji je kažnjen sa jednom mjesečnom plaćom).

4. Iako nove ustanove možda još uvijek nisu "pustile korijenje", ambasador Farrand i njegovi suradnici su uspjeli da postignu značajan napredak, naročito tokom posljednjih nekoliko nedjelja. Uspostavljena su multietnička opšinska skupština, uprava i sudstvo; Povjerenstvo za povratak koju je osnovao veleposlanik Farrand je uspjela u oblast Brčko vratiti veći broj prognanih lica i izbjeglica nego što je vraćeno širom preostalog dijela RS; multietnička policija pod nadzorom IPTF-a nadgleda značajan porast u saobraćaju preko mosta na putu do Hrvatske i sada patrolira u svim dijelovima grada Brčko i okolini. Pošto su svi ovi projekti još uvijek u začetku, nastavak međunarodnog nadzora je apsolutno neophodan za njihov dalji napredak i uspjeh.

5. Iako ovo nije trenutak da se detaljno diskutira o tom pitanju, Tribunal sa određenom rezervom gleda na opravdanost brojnih tvrdnji RS da bi "neutralna zona" bila u suprotnosti sa navodnim Daytonskim principom o razmjeri 51:49%, sa Ustavom Bosne i Hercegovine, ili i sa jednim i sa drugim. Namjeravamo da i dalje objektivno razmatramo ovo pitanje, ali naša preliminarna analiza ukazuje na to da bi bilo savršeno moguće kreirati rješenje o "neutralnoj zoni" koje se ne bi kosilo ni sa principom o razmjeri, ni sa Ustavom.

6. Da navedemo samo jedan primjer: štampa je 27. veljače 1998. godine javila da je uslijed novog stava RS po prvi put od 1991. godine uspostavljen željeznički saobraćaj između dva entiteta.

7. Tijekom svog svjedočenja na raspravi predsjednik Ganić je ubjedljivo tvrdio da će ukoliko se dozvoli da pitanje položaja međuentitetske granice ostane neriješeno poslije 15. ožujka 1998. godine (a) doći do odlaganja privrednih investicija u ovoj oblasti i (b) veliki broj bivših bošnjačkih stanovnika Brčkog odustati od povratka uslijed čega neće biti moguće povratiti predratnu multietničku ravnotežu u Brčkom. Iako Tribunal uviđa rezon tvrdnje gdina Ganića, ipak smatra da su izgledi za solidno demokratsko multietničko općinsko uređenje danas dovoljno dobri da relativno kratko odlaganje predviđeno ovom odlukom ne bi moglo da obeshrabri veći broj potencijalnih investitora ili povratnika.

8. Tribunal shvata da odlaganje od otprilike godinu dana stvara rizik da, u slučaju da međunarodna zajednica iznenada odluči da u toku te godine ili ubrzo nakon toga, tj. ubrzo nakon donošenja odluke Tribunala o međuentitetskoj granici, ukine svoje brojne programe u Bosni, uključujući SFOR, to u najmanju ruku dovodi u pitanje provedbu te odluke. S druge strane, šanse za takvo iznenadno ukidanje u toku naredne godine su prilično male; sve ukazuje na to da će programi trajati mnogo duže poslije toga. Pa ipak, postojeći rizik nikako ne dozvoljava dopunska odlaganja za početak 1999. godine.

9. Bolji uvid u moguće posljedice neispunjavanja ovih obveza se može steći iz veoma detaljnog "Prijedloga konačne odluke Arbitražnog tribunalu" koju je pred kraj tekuće faze arbitražnog postupka zastupnik Federacije podnio Tribunalu i uručio zastupniku RS.